

ELECT UPATE SEMINAR

Place: Session Hall

Dt: 12/06/18.

Resource person: Rev Siana Phaltual

Topic: Thagau lam ah Kochuam upate mawpuakna.

1. Thumapui:

Pathian in hun pha ei pia, zia hun mantam tak hi muthei ding in ei kawijiakin amasa'n Pathian chung in kipak thu ka gen hi. Thagau lama kochuam Upate mawpuakna hi a gen ding in tit penlo chu kahia ahiziakin, Committee in dawisaka ei guat ua, dawisaktna ei chansaktute chungin le kipak thu ka gen hi.

Tulai ah Kochuam *Upa* ti thumal hi thuthunglui hun lai in *Belampu* ti'in a kimang sek hi. Belampute chu Pathian in Israelte kaihuaitu ding in a guat a, Ama dawiguala puihuai ding in a la teldawte chu ahiu. Ahinla, a teldaw Upate chun a lungtuaklo in amau dawidan in ala puihuai zawtau hi. Ziakachun, Pathian in a chapa Khrista chu a mite puihuai ding in a hunsawl a, zia chu tulai kochuam puitute'n ettawn ah nei ding ahi. Zia thu tawh kigual ahin paper hi ka hungguanggal a, ka la mu tiang leh pha dinga ka gelte haw pansan in ka hungsiam zaw'i. Thu tamtak huap khawm ka nuam ah ahinla genkim zolo ding kahia, a pawimaw Bible thu leh KSP gam ah Upate'n i sepding ua kilawmte ka hung taklang hi. Ziate chu vak en suk hitiu.

2. Bible ah Belampu hina:

Bible ah Belampu hi a tak genna leh etsakna/te-khinna paumat ah ki-mang ahi. Secular writers *Homer* leh midangte jiang inle Lalte (kings) leh governor-te genna in Belampu thumal hi a la mang ui. Belampu diktakte chun belamte nek ding ngaituana in hampa tamna leh tui umna mun in a puisek ui. Belamte susethei ding; gamsa leh thildang lak in a venbit sek ui. Belampute chun a belamte laka gamsa peliamte leh a ki-gumang a um chun a neitu a dit kit sek hi (Gen. 31:39).

Bible ah Pathian chu Belampu ahi dan Sam 23 leh Isai 40:11 in I muthei a. Pathian chu belampu guala a mite enkawltu, duat taka a khut ah pui sektu ahi. Belampu'n a belamte hampa phatna a pui gual in Pathian in a mite chu lei go manpha umna mun ah pui in aveng jing sek hi.

Belampu ding chu mi- kipezo, thahat leh ama ading gello mi ahi ding ahi. Belampu kuale ginumlo taka semtute chun Pathian maitua ding ahiu. Bible in "*Ka Ang ah pang ngam ding belampu kua ahem um?*" (Jer. 39:19;50:44). Pathian belampute chu chingstup ding leh vengbittu dinga guat ahiu (Num.27:17). Belamte chu belampute'n aveng bit gual un Pathian in a mite, Israelte puihuaitu ding leh vengbittu ding in Mosi, David, thiampute leh Jawlneite haw ala guat hi. Israelte puitu ding Pathian in aguatna ziak chu puikhawmtu ding leh vengbittu ding ahiu. Ahijiakin, Pathian in Israelte dinga belampu a guatpiakte chu Pathian dawigual a puitalo in diktatlona in vai ahawmtau a, Lalpa dawng a um ta puau a, a belamte'u le a taizak zotau (Jer.10:21). Ziakiachun, Jawlnei in belampute chung a gik ding thu a gen ta (23:1-9). Zia hun lai a Belampute chu: Nawjak bep, nawmangte leh Ngaisaklote ahiu. Ziakiachun, Pathian in a mite hawlkhawm kit dingtu Belampu hawi hung tung ding kitding ka hi ati'i(23:4).

Thuthung thak hun in Khrista'n Belampu pha ahi dan i mu; (Jn.10:11), A sep ding leh hina chu belam mangte pui ding leh Belampu lian I muthei hi (IPet.2:25; Heb. 13:20). Jesu Khrista chu kochuamte belampu ahia, a sepbak sep ding chu a guatchuam, belampute sepding chu ahi. Zia na sem ding ahin mi- ginum leh midangten Khrista thuguk enkawltu ei ngai uh a pawimaw hi (1Kor.4:1,2).

3. Kochuam upa hina:

Kochuam Upa hi kochuamte'n vaihawmna lama ama'u thasang dinga ateldaw uh, vaihawmna lam leh thagau lama pastorte kithuapi ding, kochuam sum leh pai enkawltu ding leh gentheite panpitu dinga telchua- mte chu ahiu. Kochuam Upate chu taksa leh thagau lam in mawpuakna liantak mai neitu chu ahiu. Na haksa takmai semtu leh kisuangla um takmai mawpuakna neitu chu ahikit ui. Ahinla, Rom 13:1 in hotute hi Pathian guat ahi ti I mu; ziakachun, kochuam upa hina hi Pathian guat ahin zia chuh i pawmthei ding uh ahi.

4. Kochuam neitu hetding ahi:

Kocuam Upa hina Pathian in ei piakna hi a Kochuamte enkawltu dinga eiguat jiak ahi. Zia Kochuam chu a neitu Khrista ahi. Kohuam mite zosia hi Khrista'n a ma adinga a thisan ah a chawksa ahiu a, zia enkawltu dinga chun Upate ateldawkw ahi. Kochuamte etkawlina lam ahin chitthei pawimaw a, aneitu lung hawljing kawma sepding ahi. Zia hi hethiamlo in eimau Lalna gam leh thuneina gam guala ngaitua a gamtat thei ahi. Kochuam hi eima a ahipua, a neitu hetjinga bawlkhial khak ding kiven ma ma ding ahi. Bible in, "*Mihing chu midang chung in sual leh Pathian in a hukdawkw thei hi. Himaleh, Lalpa chung a sual bawl chu kua'n hukdawkw thei ding ahem?*" (1Sam:2:25).

5. La kitiamnaun hezing un:

Kochuam Upa hitate hin a himasang un kitiamna anei sek ui. Zia tiamna guala umlo sek hi ei kochuam sunga Upate hin ha bawl diak hileu hin a kilawm a akhawk mama hi. Kochuamte'n suang tak leh muang takin Upa ding in ei teldawkw ua, zia chun KSP in Pathian leh Presbytery min in namdetna a nei sek hi. Namdetna a nei masang in Kochuamte leh Pathian masang in moderator in Upa namdet thak dingte chu kitiamna a neisak sek chuh;

i. I kochuam thugin 10 (sawmte) leh thununna dante hi Pathian thu Bu ziltina diktak ahi gingchan la pawmdet em?

=Thugin la pawmdet em? Moderator in adawtlai in YES ti ve maimai.. chawmkhat zaw le midangte thugin Presbyterian thugin sanga va pawmzaw kitzel a ki-um sek hi.

ii. Kochuam ki-etkawlna dan (constitution) hi kochuam ki-etkawlna din la pawm det em?

=Kochuam upate Constitution hi bang ahi helo, hethiamlo leh pawm keilo tamtak a ki-um hi. Chuleh, ordination chanzaw phat leh YES la vati sek uh kha la hetmil sek un buai um tak ahi. Chuleh, Presbytery in a vaihawmna chu chutmun chiat a pawmlo tawp a ki-um sek hi.

iii. Thagau thiangtho leh Kochuam in a ko gual ngei in Kochuam Upa nasep hi ginum tak ah sem din la tup det em?

= Zia thu ahin Yes la vati kit sek un, ahinla, hetdinga pawimaw mama khat chu Pathian leh Kochuamte masanga juau gengenlo ding ahi. Zia thu hin a dawu chu gin-umna ahia, a gen thaw mai hilo in a tak tak gam ale gin-umna a pawimaw hi. Thagau Thiangtho kona gual ngei ah kihia i hichun I gin-um ding ahi.

6. House visit:

Upa hiding a gin um taka kitiamna i neinau in a huap chu House visit, kochuamte vethak hi ahi. House hi Kochuamte dinmun hiatna leh kaihuaina kalbi ahin bawltei dinga pawimaw chu ahi. Zia house visit hi kochuam Upa khenkhatte'n ngai pawimawlo a bang ui. Khenkhat chun visit a pawimaw chun kochuamte'n ei hung ko mai in'au ti ah lungmuang taka um mai a kitam hi. Khenkhat kit inla house visit hi pastorte na ding ahi tiloi ki-um kit ahi. Kochuam upa na hi lalna lam ahipua, suak nasep ahijawi. Upate haw chu Pathian belamte chingtup ding leh enkawltu dingte ahijo'u ahi.(1Pet. 5:1-4). House visit a pawimawna vak en suk hitiu.

a). Kochuamte laka damlo umthei:

House visit hi kochuamte kanthakna ahia chuleh, a dinmun uh le hiatchianna ahikit hi. Kochuamte damlo pauchap piak ngaite pauchap piakna dinga hun lemchang ahi. Damlo khenkhatte'n kochuam upate pauchap piakna ngaina tuntun mai ahinla, ko ngamlote a dinga lemchang mama ahi. Doctorte mi'n anai gual ua thil bawlthei tak guala um mailo ding ahi. Upate a dinga missioanary field ahimai hi.

b). Kochuamte thanop sak theitu ahi:

Upate'n kochuamte visit a bawl uhin kochuamte suk-hatna khat ahi. Mihingte hi kibanglo i hui a, gal apat eila thil zing mi ki-um sek ahi. Ve tu ding thilzing, maleh ko ngamlo kochuam sunga mi um sek ahi. Ziagual mite chu chaw-hal ngai ahiu a, chun kochuam lam ale lunglut sak ngai jingte ahiu.

c). Pastorte'n le ngaina ahiu:

House visit hi Upate khenkhat chun pastorte nasep ding chu house visit ahi; zia dinga chu ki-gawi ahiu titawp bang ki-um ahi. Ahijiaka house visit hi pastorte jiang inle ngaina ahiu ti hi hetmillo ding ahi. Pastor ahivang un mihing ahiu hetmillo ding ahi.

d). Ginna diklo laka kochuamte venbitna ahi:

Tulai kochuam gam ahin gindan chuam chuam a um a; khenkhatte chu Presbyterian kochuam in pawmlo kei a um hi. Ziate chu UPC, Seventh Day, Church of Christ leh a dangdang tampi a um hi. Gindan diklote hin gamlak ding gua'n ei lak tiang inle kochuamte hi a gukin ala jawl zing ui. Gindan diklote'n pawl ahawl zinglai un ei un kochuamte limsaklo, ngaimuang taka i um jing kal un belamte ala lamvai kha sek ui. Mi khenkhatte chu ei ginna chiapi (Presbyterian in ginna a chiapi) helo a um tamtak um ahiu in venbit a pawimaw khawpmai hi. Akhawk khat chu kochuam Upa khat hita; gin dan diklote i pawmlo dan le helo ki-um sek ahi. Upa khat chun a kochuamte vengbitjo dinga Pathian thu le a hetding ahin house visit le a bawl ding ahi. House visit hi kochuamte vengbitna ahia, chule ginna thu a le jiltilna ahi bawh hi.

7. Bial kikhen ding ahi:

Kochuam khat chu In 5 sanga tawmzaw ahilo nakl e bial kikhen ding ahi, zia chu jangkhaina ahi. Zia Upa bial kikhen hi sumdawl ding bep le programme khat mat tak le chairman/thugen ah panna ding bep ahi puai. Bial sunga kochuamte chu taksa leh thagau lama mawpuakna ahijaw'i.KSP gama chun khenkhat in bial kikhen chu bawl sam uh ahijiaka In chuanlo a ki-umjel hi. Zia gual bial kikhen chunlawkna bangma tutlo ding ahi. Chun, upate'n bial la chawt phat ua le bialtu pastor la ko thei jing ui ti hi hetmillo ding ahi.Bial kikhen hin atup chu kochuamte nutsia umlo ah suk-khak suak chu atup ahijawi.

8. Kochuam upa chu puitu ahi:

Kochuam Upa khat chu Pathian neimi, Pathian thu ki-nga jo leh hemi, midangte puihuaijota dinga teldawte chu ahiu. Ziakiachun, kochuamte lunsun lai ua thamuantu ahi ding uh ahi, thagau lam ah a nung-tawl lai ua le a kaidingtu ahi ding uh ahi. Ginna lama midangte su-hattu ding, pauchappiak ding leh zu leh khamthei ah kihelte holimpi ah siamphatu ahi ding uh ahi. Zia haw zosia hi suk pitingna ding in Pathian nei angai hi. Ziakiachun, kochuam Upate chu taksa lama puitu hilo in thagau lama puitu ahiu hi.

9. Presbytery hetjing ding ahi;

Titlo ah i umlai ua tit dinga ei siamtu leh Upa dinga ei namdettu chu Presbytery ahi. Ahinla, Upa khenkhatte'n I bulpi leh ei namdettu chu Upa i hizaw nung le i melma gual in i gel sek ui. Zia hi bawlllo kei ding ahi. I paukam matsek: KSPte po i ti mai mai sek ui. KSP in a kochuamte, khawkhat ah umte enkawl dinga a hun guat ahia, a guattu la dolo kei ding ahi. Bulpi lam in bang ngaidan a nei em, chiadan a nei sek em ti chu ngaiven ding ahi. Thuching in, "*Nau chaga i vak vak le atawp le i chung in ek a tha'i*" tikha sukpinglo ding ahi. Local church ngaikhawk takluat jiaka le KSP dothei ahia, ahinla Local Kochuam neitu jawk kha KSP ahi ti hetding ahi.

10. Committee ngaikhawk ding ahi:

Kochuam upa khat ding a teldaw ah umte hi a teldawktu kochuamte a dinga palaa khat ahia, ziakiachun Committee zosia hi ngaikhawk ding ahi. Kochuam upa khenkhat committee leh khawmpu ngaisaklo a ki-um in, ahinla a umna kochuam ah chun dan leh dun kihetsak mama kit ahisek ui. Ziagual mite hin kochuamte a pui kawi ut mama sek ui. Committee ah thu ki-gen leh ki-gualnate- vaihawmna ah ki-thugualnate haw helo kochuam upa a ki-um sek a, ziate haw chu higuatlo ding ahi. Kochuamte lamzang taka a chiatheina ding un upa khat chun committee leh khawmpu vaihawmna het tei ding ahi. Bangma helo ah a ki-umphat le mite nuisan a kihisek hi.Gal panglo ding ahi. (Thupukna thak mi'n a juiphat le a helo pen a pangsek uh, zia phat chule zia KSPte hile tijel) Chun, pastorte control thei ding khawpa vaihawmna le hetding ahi.

11.Thukhakna:

Pathian chu kochuamte blampu lian ahia, ama entawn a a mite(kochuamte) enkawla vengbittu dinga chun belampute (Upate) guat ahiu. Kochuamte'n a kaihuai uh kochuam upa hilo a, Khrista lam enjing kawma kochuamte enkawltu ding leh kaihuaitu ding ahiu.Upa dinga eiteldawktu Khrista lung hawljingtute chun kochuam a etkawlte chungin diktat tak in a tawisek in, alawting sek hi. Pathian in ei chawisang thei in ei kawiniam thei ahi. Ziakiachun, i mawpuaknateu chu ginum takin sem hitiu.

Lalpa'n ei mawlzawl piak taken!